

Մասնակի յիշատակութիւնից շատ աւելի կարեւոր է այն հանգամանքը, որ Փաւստոս տակաւին չզիտէ սեպուհներին որպէս ուրոյն դաս: Նա որ սիրում է շարել՝ «նախարարք, մեծամեծք, աւագք կուսակալք, աշխարհակալք, ազատք, զօրագլուխք, դատաւորք, պետք, իշխանք» (Գ. 3) եւ անգամ սատրապք, ոչ մի անգամ չէ յիշում սրանց շարքին սեպուհք:

Մինչդեռ Փարպեցու մօտ տանուտէրներէ քով միշտ հրապարակի վրայ են սեպուհները եւ այնքան ինքնուրոյն են թուում, որ ստորագրում են եւ կնքում քաղաքական դաշինք, ինչպէս երեւում է Վասակի դատից:

Միւս կողմից հաստատապէս դիտենք, որ Արեւմտեան Հայաստանում նախարարական հոգիքի բաժանում տան այր անդամներէ մէջ արդէն ընդունուած սովորոյթ էր Զ. դարում: Այս մասին ճշտում են յատկապէս Յուստինիոսի նովելները 536 թուից: Պարսկական Հայաստանում նախարարական կարգը աւելի կայուն էր, գուցէ աւելի քիչ վտանգուած, քան բիւզանդական բաժնում: Սակայն, սեպուհներէ անկախութիւնը փաստ կարելի է համարել Զ. դարում նաեւ պարսկական բաժնի համար:

Եթէ պէտք կայ հասարակական պատմական երեւոյթները դնել ժամանակադրական թելի վրայ, սեպահական ազատութեան թելը ընկնում է Ե. եւ Զ. դարերի վրայ: Ասել է թէ այդ միջոցին է, որ սոյն երեւոյթը զարգացել, տիրացել է կեանքին: Այս է ընդհանրացման իմաստը:

Խորենացու ժամանակ սեպահական պայտապատութիւնը շարունակում էր վէճերի եւ հակառակութեանց նիւթ լինել: Իբրեւ ապացոյց, որ Խորենացին քաջ ծանօթ էր քննածս հարցին, եւ ուրեմն նրա ժամանակ սեպուհների անջատումը տիրական երեւոյթ էր, յիշել ենք պատմահօր անդեկութիւնը Հաշտեանքի եւ Առքերան եւ Ալիովլտի Արշակունիների վերաբերեալ: Կարեւոր ենք համարել այն, որ հայ պատմիչը հնարաւոր է գտնում հայրենական ստացուածքի բաժանումը տան զաւակներէ մէջ հաւասար եւ ըստ մարդաթուի:

Արշակունեաց տունը մի մեծ նախարարութիւն է. ինչ որ ընդունուած է նրանց մօտ, կարելի է ասել, հասարակաց է եւ բնորոշ նա-

խարարական միջավայրի: Խորենացու ենթադրած բաժանումը ոչ այլ ինչ է եթէ ոչ սեպահական իրաւունքի արտայայտութիւն:

Մեր այս մեկնութիւնը պ. Մանանդեան համարում է վիճելի: Ինչո՞ւ. որովհետեւ հողի հաւասար բաժանումը «խիստ արտասովոր է եւ անօրինակ կալուածատէր ազնուական դասի համար», դատում է պ. Մանանդեան:

Այստեղից մի բան է միայն հետեւում, որ պատմահօր խօսքերը սխալ է ըմբռնում պ. Մանանդեան: Բայց սա գերադասում է անհեթեթութիւնը վերագրել Խորենացուն: Այլ եւ կարծում է որ հողի հաւասար բաժանումը «համայնական հողատիրութեան որոշ կարգ է», եւ երկար պտոյտներից յետոյ գտնում է եւ այն միջավայրը, ուր գործում էր այդ կարգը:

Ընթերցողը զարմացմամբ լսում է, որ համայնատիրականները ոստանիկ կոչուած մարդիկն էին, եւ սրանց մի մասն էլ այս պատճառով ազնուականների շարքից հանում է եւ դարձնում շինական: Բայց ինչպէ՞ս է եղել, որ լուրջ պատմահայրը զիւղական սովորոյթը վերագրել է ազնուական, այն էլ թագաւորական, տան:

Սրա պատասխանն էլ է գտել պ. Մանանդեան. Խորենացին որպէս թէ սխալուել է, ոստանիկներին Արշակունեաց սերունդ համարելով:

Քննադատական յանձնարարելի մեթոտ չէ՝ մեղադրել մատենադրին նախ քան փորձել պտոյտը եւ բաւարար մեկնութիւն տալ նրա խօսքերին:

Արդ՝ մարդաթիւ բառը, որ դայթակղութեան բուն քարն է, երկու կերպ կարելի է հասկանալ, համաձայն մարդ բառի կրկնակի նշանակութեան: Ոչ միայն մեր, այլեւ մեր հարեան պարսիկ լեզուում, մարդ ասելով հասկացում է սովորաբար այր մարդ եւ ինչպէս երեւում է այս գործածութիւնը հնուց է: Ս. Գրքում միայն մի անգամ է պատահում մարդաթիւ բառը իր լայն իմաստով (Ելք. ԺԲ. 4): Բայց նոյն Ս. Գիրքը յաճախ կրկնում է թուոց դրքի առաջին գլխում. «առէք զհամար ամենայն ժողովրդեան որդւոցն Իսրայէլի, ըստ բուոց, ըստ գլխոց» եւ իսկոյն բացատրում է՝ «ամենայն արու ի քսանամենից եւ ի վեր»: